

19 OCT 2001

Laporan-Asing

BURUH ASING MASIH DIPERLUKAN DALAM PEMBANGUNAN BEBERAPA SEKTOR

KUALA LUMPUR, 19 Okt (Bernama) -- Kerajaan akan meneruskan dasar untuk mengurangkan pergantungan terhadap buruh asing, khususnya buruh tidak mahir, walaupun tempoh permit kerja dikurangkan dari tujuh kepada tiga tahun.

Kerajaan meluluskan seramai 93,025 pekerja asing baru tahun ini memandangkan sektor pertanian, pembinaan dan perkilangan masih mengalami kekurangan tenaga buruh, menurut Perbendaharaan dalam Laporan Ekonomi 2001/2002 hari ini.

Langkah tersebut dibuat bagi memastikan perkembangan perniagaan tidak terjejas walaupun jumlah itu adalah 22.8 peratus lebih rendah berbanding 120,502 orang pada tahun lalu.

Sehingga akhir Jun tahun ini, jumlah buruh asing yang berdaftar meningkat 10.6 peratus kepada 810,695 orang berbanding 732,588 orang pada tempoh sama tahun lalu, dengan 12,705 daripada mereka pekerja mahir.

India mencatatkan bilangan pekerja mahir terbesar dengan jumlah pekerja yang diluluskan 2,489 orang, diikuti oleh Jepun seramai 1,537, dan China 1,007 orang.

Menurut laporan itu, peningkatan penggunaan pekerja asing dapat dilihat dalam sektor perkilangan berjumlah 311,785 atau 38.5 peratus berbanding 271,892 pada tahun sebelumnya.

Sektor pertanian dan pembinaan juga menyaksikan peningkatan penggunaan pekerja asing dengan masing-masing meningkat kepada 204,814 (2000: 175,834) dan 68,355 (2000: 65,891).

Indonesia mencatatkan jumlah terbesar pekerja asing di negara ini dengan 598,900 pekerja, diikuti Bangladesh (147,637), Filipina (15,323), Thailand (6,538) dan 42,297 pekerja lagi adalah dari negara-negara lain.

Perbendaharaan juga menyebut bahawa kes mogok yang berlaku di Malaysia dilaporkan masih lagi terkawal sepanjang tujuh bulan pertama tahun ini dengan sejumlah 10 kes dilaporkan berbanding lapan kes dalam tempoh yang sama tahun 2000.

Jumlah pekerja yang terlibat dengan kes mogok tahun ini adalah berkurangan pada 1,342 orang pekerja berbanding 2,580 pekerja pada tahun sebelumnya.

Perbendaharaan berkata enam kes dicatatkan dalam sektor perkilangan yang melibatkan 979 orang pekerja dan dua kes dilaporkan berlaku dalam sektor pertanian dengan melibatkan 128 orang.

Mogok yang berlaku telah mengakibatkan kehilangan sejumlah 3,371 hari bekerja, bagaimanapun jumlah itu adalah lebih rendah daripada jumlah kehilangan hari kerja yang dicatatkan dalam tempoh yang sama tahun lepas sebanyak 5,073 hari.

-- BERNAMA

FA MFJ NMO